

BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON/KANTON SREDIŠNJA BOSNA

KANTONALNI SUD U NOVOM TRAVNIKU

Broj: 06 0 V 014655 20 V

Novi Travnik, 08.02.2021. godine

Kantonalni sud u Novom Travniku, sudija Alma Islamović u vanparničnom postupku po prijedlogu predlagateljice J. Dz. Z., nastanjena na adresi ..., N. Y., zastupana po punomoćniku A. J. iz B. ul....., protiv protupredlagatelja M. M. Z., nastanjen na adresi..., N.Y., radi priznanja strane sudske odluke o razvodu braka, dana 08.02.2021. godine, donio je slijedeće:

RJEŠENJE

Vraća se prijedlog za priznanje strane sudske odluke, koji je u ovaj sud zaprimljen dana 22.12.2020. godine, te se poziva predlagateljica J. Dz. Z. da u roku od 8 (osam) dana od dana prijema ovog rješenja uredi prijedlog tako što će u istom navesti ime i prezime predlagateljice i protivnika predlagatelja sa tačnim adresama stanovanja kako bi isti mogli učestvovati u ovom postupku i ovom sudu dostavi slijedeće dokumente:

- Original presudu o razvodu braka Vrhovnog suda Okrug Broome, New York sa doznačenom „klauzulom pravosnažnosti“;
- Original izvod iz matične knjige vjenčanih;
- Original izvod iz matične knjige rođenih;
- dostavi dokaz da punomoćnik A. J. spada u red lica iz člana 301.stav 1. Zakona o parničnom postupku F BiH da predlagateljicu može zastupati u ovom postupku ili ako isti ne spada u red navedenih lica za zastupanje, da uredi prijedlog tako što će za dalje zastupanje u ovom predmetu angažovati advokata sa područja BiH i istom dati urednu punomoć ili da naznači da će sam kao fizičko lice učestvovati u postupku bez davanja punomoći advokatu upisanom u imenik advokata sa područja BiH.

Ukoliko predlagateljica ne postupi po ovom rješenju u navedenom roku, ovaj sud će smatrati da je prijedlog povučen, a ako bude vraćen bez dopune, isti će se odbaciti, a sve u skladu s članom 336. stav 1. i 3. Zakona o parničnom postupku FBiH.

Obrazloženje

Dana 22.12.2020. godine u ovaj sud zaprimljen je podnesak predlagateljice J.Dz.Z., nastanjena na adresi ..., N.Y., kojim se od ovog suda traži da se izvrši priznanje presude o razvodu braka Vrhovnog suda Okrug Bromme, New York index broj: EFCA2019002197 od 27.11.2019. godine.

Iz stanja spisa proizilazi da je predlagateljica ovom sudu dostavila slijedeće dokumente: original presudu o razvodu braka Vrhovnog suda Okrug Broome, New York index broj: EFCA2019002197 od 27.11.2019. godine, prijevod odluke od ovlaštenog sudskog tumača za engleski jezik sa područja BiH, sporazum o rastavi/namirenju, dodatak Sporazuma o rastavi/namirenju, zahtjev za promjenu

imena, izjava od 27.11.2020. godine, punomoć i dokaz o uplati sudske takse uplatnicu u iznosu od 200,00 KM.

Izvršenim uvidom u podnesak predlagateljice i dostavljenu dokumentaciju, utvrđeno je da predlagateljica traži priznanje presude o razvodu braka Vrhovnog suda Okrug Brome, New York za označene vanparnične stranke, a kako bi u Ministarstvu unutrašnje bezbjednosti, Služba za državljanstvo i imigracije u SAD- u mogla izvršiti promjene u imenu i prezimenu, međutim isti nisu navedeni u pismenom prijedlogu sa tačnim adresama stanovanja na koje bi im se mogle dostaviti sudske odluke odnosno kako bi im se omogućilo raspravljanje u ovom postupku.

Nadalje, odredbom člana 301. stav 1. Zakona o parničnom postupku FBiH, u daljnjem tekstu: ZPP („Sl. novine Federacije BiH“, broj: 53/03, 73/05, 19/06 i 98/15), propisano je: „(1) *Punomoćnik može biti advokat, advokatsko društvo ili uposlenik službe za besplatnu pravnu pomoć, kao i za pravne osobe uposlenik te pravne osobe, a za fizičke osobe bračni odnosno vanbračni drug stranke ili srodnik stranke po krvi po prvoj liniji do bilo kojeg stepena, u pobočnoj do četvrtog stepena zaključno, odnosno srodnik po tazbini zaključno do drugog stepena.*

Odredbom člana 7. stav 1. Zakonu o advokaturi F BiH („Sl. novine Federacije BiH“, broj: 40/02; 29/03 i 18/05), propisano je da svaka stranka ima pravo slobodnog izbora advokata koji je ovlašten da obavlja advokatsku djelatnost u Federaciji Bosne i Hercegovine u skladu sa ovim Zakonom. Dok je stavom 2. istog člana propisano da advokat upisan u Imenik advokata u Federaciji ili odgovarajući Imenik u Republici Srpskoj ima pravo zastupati i braniti sve fizičke i pravne osobe pred sudovima, upravnim organima i svim ostalim organizacijama u Federaciji.

Međutim, iz podneska predlagateljice, a kojim se traži priznanje strane sudske odluke i dostavljene dokumentacije, utvrđeno je da prijedlog sadrži procesne smetnje u pogledu zastupanja predlagateljice J. D. Z. jer uz dostavljenu dokumentaciju nije priložen dokaz da je punomoćnik predlagateljice A. J. u skladu sa odredbom člana 301. stav 1. ZPP-a u srodstvu za vlastodavcem punomoći odnosno bračni ili vanbračni drug stranke ili srodnik stranke po krvi po prvoj liniji do bilo kojeg stepena, u pobočnoj do četvrtog stepena zaključno, odnosno srodnik po tazbini zaključno do drugog stepena, stoga je predlagateljica dužna postupiti kako je to naloženo u izreci ovog rješenja. Također, neophodno je da ista dostavi i original presudu o razvodu braka Vrhovnog suda Okrug Broome, New York sa doznačenom „klauzulom pravosnažnosti, original izvoda iz matične knjige vjenčanih te original izvoda iz matične knjige rođenih a koji dokumenti su neophodni u ovoj vrsti postupka.

Imajući u vidu naprijed navedeno, sud je primjenom odredbi člana 336. stav 1. i 3. ZPP- i člana 53. i 301. ZPP-a, a u vezi sa odredbom člana 2. stav 2. Zakona o vanparničnom postupku FBiH („Službene novine FBiH“, broj: 2/98, 39/04 i 73/05) odlučio kao u izreci rješenja.

Ako predlagateljica u ostavljenom roku ovom sudu ne dostavi traženu dokumentaciju, smatra se da je prijedlog povučen, a ako prijedlog bude dostavljen bez traženih ispravki i dopuna, prijedlog će biti odbačen, u skladu sa članom 336. st. 3. Zakona o parničnom postupku („Službene novine Federacije BiH“, broj 53/03, 75/05, 19/06 i 98/15), a u vezi s odredbama člana 2. stav 2. Zakona o vanparničnom postupku Federacije BiH

(„Službene novine Federacije BiH”, broj 2/98, 39/04, I 73/05), pa je odlučio kao u izreci rješenja.

Sudija

Alma Islamović